

## lis Gnovis

■ **PUART.** In vore pe «Legre Diminuzion»

Intant de sò ultime assemblee, i 20 Circui dal «Moviment pe Legre Diminuzion» ch'a seguissin la ferade di Serge Latouche e di Maurizio Pallante ([www.decrescitafelice.it](http://www.decrescitafelice.it)) a àn rinovât il so diretif par diventâ un'associazion ancjemò «plui inclusive e plui partecipade, ch'è crôt te colaborazion e te contaminazion». Cui presidents Lucia Cuffaro e Michel Cardito, al colaborarà ancje un puartevoûs dal Circul furlan «Livence-Tiliment», al ven a stâi Andrea Pavan. Chei altris sorestants a rivin di Vignesie, di Padue, di Milan, di Verone, di Turin, di Bari, di Cagliari e di Cuneo. Il segretari gnûf di «Mdf» al sarà Cristian Bacci, ch'al ven di Mugle (te provincie di Triest).

■ **UDIN.** In place pe clime

Vinars ai 24 di Mai e je la zornade stabilide pal secont siopar mondiâl cuntri dai mudaments climatics e par imponi la rivoluzion economiche ch'è covente par salvâ il mont da la distruzion ambientâl. Students e Clapis ambientalistis a son daûr a organizâsi, su lis olmis di Greta Thunberg e inspirâts des peraulis di Pape Francesc, scritis su la letare encicliche «Laudato si'». Cui ch'al vûl colaborà te organizazion o ben restâ informât al pues scrutinâ il profil <https://www.facebook.com/events/1963760843732629/> e une schirie di lûcs Internet tematics.

■ **LEÇÀ.** Cooperazion internazionâl

Ducj i socis e i amis dal Centri pal volontariât internazionâl «CeVi» ([www.cevi.coop](http://www.cevi.coop)), ai 25 di Mai, si dan dongje a Leçà di Pagnà pe assemblee anuâl de cooperative. Daspò di un confront sui progjets inviâts e su lis perspectivis futuris, il «CeVi» al inzornarà il so statût, al scrutinà i balançs dal 2018 e al rinovarà il consei diretif, votant un president gnûf. La convigne e tacarà a 15 e po e finissarà cuntune cene comunitarie. Il confront al sarà un grum delicât, stant che si trate di decidi la linie pai agns avignî, in face dai savoltaments globâi e de trasformazion dal mont de Cooperazion internazionâl.

■ **GURIZE.** L'ereditât di Franz Joseph

Il Centri ricercjis turisim e culture di Gurize, cul jutori dal Comun, fintremai ai 16 di Jugn, al presente la mostre «Francesc Josef I. Om Imperadôr Protetôr des Siencis e des Arts». L'esposizion e je imbastide li dal Museu gurizan «Santa Chiara» dal

cors Verdi. Oraris: vinars, sabide e domenie, 10-13 / 15.30-19.30. Ogni domenie a 16.30, visitis guidadis cui curadôrs, Marina Bressan e Marino De Grassi. Par prenotazions pai groups: 331 2388939.

<b>Joibe 16</b>	S. Ubalt vescul	<b>Lunis 20</b>	S. Bernardin
<b>Vinars 17</b>	S. Pascual	<b>Martars 21</b>	S. Cristofor
<b>Sabide 18</b>	S. Felîç di Cantalice	<b>Miercus 22</b>	S. Rite di Cascie
<b>Domenie 19</b>	S. Crispin	<b>Il timp</b>	Ancjemò cîl nulât e plois



**Il soreli**  
Ai 15 al iève aes 5.35  
e al va a mont aes 20.32.



**La lune**  
Ai 18 Lune plene.

**Il proverbi**  
Chel ch'al vûl sentâsi sun dôs cjadreis  
al va a finî cul cûl par tiere.

**Lis voris dal mès**  
Tal ort si à di intervignî cuntri i pedoi,  
i cais, lis dorifaris des patatis.

## Meti man al avignî

Dai 21 di Mai ai 6 di Jugn, al torne il «Festival dal svilup sostignibil»

**D**isesiet dis di dibatiments e di confronts, dapardut e par ogni categorie di personis, par no dismenteâsi nancje un dai 17 obietifs segnâts su l'«Agjende 2030», tant a di il programe di lavôr impreteribil, butât jù dal «Onu» e fat bon za fa 4 agns de Assemblee gjenerâl des Nazions unidis, par sconzurâ lis menacis plui griviis e par distrigâ, dentri dal 2030, i slaiifs plui pençs ch'a inderedin un vèr svilup integrâl par dute l'umanità. Dai 21 di Mai ai 6 di Jugn, cun cheste inficje e cun chest fin, al torne il «Festival dal svilup sostignibil», inmaneât di «AsviS» pe tierce volte, in grazie dal impegn e de mobilitazion di dutis chês passe 200 organizacions e rêts de Societât civil taliane leadis te «Aleanca pal svilup sostignibil». Par otignî i 17 obietifs (che tai documents internazionâi a son stâts batiâts «Sustainable development goals», «SDGs») si scuen passâ par 169 «Target» di stramudâ in politicis positivis e in strategiis amministrativis in ducj i Paîs dal mont e di ducj i setôrs d'intervent des Amministracions publichis, ma ancje des Associazions economicis e di ogni gjenar di Formazion sociâl. La sostignibilitât, cuant che no je ridusude a une sfloçje propagandistiche o a un artifici retorico su la bocje di imprenditôrs e di sorestants balonîrs, e tocje intune lis dimensions economiche, sociâl e ambientâl. Il Festival di «AsviS», presentât tal lûc internet [www.festivalsvilupposostenibile.it](http://www.festivalsvilupposostenibile.it), si learà insom cu lis



Par meti in vore l'«Agjende 2030», a coventin un mudament culturâl vèr e compuartaments coerents cui «Sustainable development goals»

manifestazions inmaneadis in Europe, di chê strade dal «European Sustainable Development Week», programât dai 30 di Mai ai 5 di Jugn, par impegnâ ancje i gnûfs sorestants de «Ue», ch'a saran votâts ai 26 di Mai dai popui europeans. Lis manifestazions programadis no smirin dome di sensibilizâ lis Comunitâts sui obietifs dal svilup sostignibil e d'impegnâ ducj chei ch'a àn responsabilitâts di ogni fate te Politiche e te Economie, ma ancje di stiçâ il confront e il dibatiment par burî fûr soluzions gnovis e par inviâ procès creatîfs e trasversâi.

«In Italie, il percors viers la sostignibilitât economiche, sociâl e ambientâl al è bielzà partît – a declarin il president di «AsviS», Pierluigi Stefanini, e il puartevoûs, Enrico Giovannini –, ma in zornade di vuè al covente un impegn plui ferbint de bande de Politiche, tant chenti che in Europe. Il mudament culturâl e i compuartaments individuâi e coletîfs che nus coventin no àn di jessi promovûts dome dai esperts, ma nus vûl ancje une pression dal bas in stât di vincolâ la Politiche al rispjet dai impegn».

Mario Zili

## Plurilinguism, 25 agns di scandais

Il Centri internazionâl sul plurilinguism de Universitât al festeze 25 agns cuntune mostre, imbastide a Udin, li di palaç Antonini (al numar 8 di strade Petracco). Si podarà visitâ l'esposizion «Centro Internazionale sul Plurilinguismo 1994-2019: Informazione, documentazione, ricerca» fintremai ai 25 di Mai. «Il nestri fin – al à motivât il diretôr Renato Oniga – al è chel di sensibilizâ la int di scuele e di culture di une region marcade dal plurilinguism, cun 4 lenghis ricognossudis in forme uficiâl – furlan, sloven, talian e todesc –, cu lis fevelis venitis e cun cetantis lenghis rivadis dongje in grazie des migrazions».

## Messe par furlan cu la corâl

**«Bariglarie» di Udin**  
A Udin, la Messe par furlan e ven cjantade ogni sabide a 18, li de capele de «Puritât», daprûf dal domo. Sabide ai 18 di Mai e compagnarà la celebrazion liturgjiche la corâl «Bariglarie» di Udin. Al cjantarà messe pre Davide Larice dal Centri «Solidarietà Giovani». Radio Spazio e trasmet sul moment, ogni setemane, dute la liturgjie.

Peraulis in dismentie par cure di Mario Martinis❖ **CJÔT**

s.m. = stalluccio, stabbio (a volte stavola), porcile (in Carnia piccola stalla per capre e pecore), ma anche casale; borgatella (dal latino *cautum* "luogo sorvegliato")  
Nete il cjôt prime di puartâ lis bestiis, par plasê.  
*Pulisci lo stabbio prima di portare gli animali, per piacere.*

❖ **CJUCE**

s.f. = testa (brillante), capo (etimologia dubbia)  
Ce cjuce!  
Che testa!

❖ **CJUCJ**

s.m. = succhiatoio, poppaiola; succhiotto (forma deverbale da *cjucjâ* "succhiare, poppare"  
dal latino *\*suctiare*)  
Ai fruts piçui ur plâs une vore il cjucj.  
Ai bambini piccoli piace moltissimo il succhiotto.

❖ **CLEVE**

s.f. = salita o strada in salita; pendio, declivio (dal latino volgare *\*clēva*, sostituto della forma *clīva*)  
La aghe dai rivuats e cor dapit de cleve.  
*L'acqua del rivo corre in fondo al declivio.*

❖ **CLIP**

agg. = tiepido (dal latino volgare *\*tep(u)lus*)  
Il lat al à di sei clip, ne masse frèt ne masse cjalt.  
*Il latte deve essere tiepido, né troppo freddo né troppo caldo.*

❖ **CLOPÂ**

v.= vacillare, tentennare; guazzare dell'uovo; gorgogliare (in un contenitore/recipiente o in gola) (dal latino *cloppus* "zoppo")  
La siele de biciclete e clope, viôt di dâi une strinzude cu la clâf di 15.  
*La sella della bicicletta vacilla, cerca di stringerla con la chiave n. 15.*